

**Inuiaqatigiinni siulersuisutut ilaasortaaffinni pingaarutilinni issiasussanngorlugit toqqarneqartartut toqqaqqinneqartartullu piukkunnarneri piginnaanerilu Inatsisartunit paasisimasaqarfigileqqullugu ataavartumik Naalakkersuisut namminersorlutik oqartussani 100 %-mik pigineqartuni siulersuisut pillugit nalilersuinernik Inatsisartut Kukkunersuineranut Ataatsimiititaliaanut taamatullu Inatsisartut Aningaasaqarnermut Akileraartarnermullu Ataatsimiititaliaanut nassiussisalernissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut**

(Inatsisartunut ilaasortaq Andreas Uldum, Demokraatit)

### **Akissuteqaat**

(Naalakkersuisut Siulittaasuat)

### **Siullermeerneqarnera**

Siunnersuuteqartup siunertaraa siulersuisunut ilaasortat pillugit Ataatsimiititalianut ingerlaavartumik nassiunneqartalernerisigut siulersuisunut ilaasortat piukkunnarnerinik piginnaasaqarnerinillu paasisimasaqarnissap qulakkeerneqarnissaa.

Naalakkersuisut isumaqatigilluinnarpaat siulersuisunut ilaasortat eqqortunik piginnaasaqassammata aamma Naalakkersuisut pingaartilluinnarpaat ingerlatseqatigiiffinni Namminersorlutik Oqartussanit pigineqartuni siulersuisut suliamut ilisimasaqartuunissaat.

Aalajangiiffigisassatulli maannakkut siunnersuutigineqartoq siulersuisuni piginnaasalinnik ilaasortassarsiortarnermut kingunipiloqartussatut nalilerneqarallarpoq. Siulersuisut suliamut pikkorisunik inuttallit tassaapput ingerlatseqatigiiffiit pitsaanerpaamik ingerlanneqarnissaannut pisariaqartut aammalu naleqqutinngitsumik pilitikk ikkut akuliussuuttoqannginnissaanut pisariaqartut.

Naalakkersuisut ingerlatseqatigiiffinnik piginnittuunermut isumatusaartumik periuseqarnerat siunissamut ungasinnerusumut anguniagassanik killissarititanillu aalajangersimasunik imaqartoq aammalu siulersuisunik sungiussisimasunik ingerlatsisoqartoq maannangaq pitsaasunik kinguneqalereerpoq. Tamanna ingerlatseqatigiiffiit Namminersorlutik Oqartussanit pigineqartut aningaasaqarnerannik aqutsilersimanikkut erserpoq. Ingerlatseqatigiiffiit tamarmik, ataaseq kisimi pinnani, 2012-imi sinneqartoortut ingerlatseqatigiiffiillu maanna tamarmik mianersorlutik aningaasanik aqutsineq ingerlappaat. Tamakkua tamarmik Nunap Karsianut aningaasanik isaatitsinissaq, aammalu taamaasilluni akileraartartut, aningaasanik annaasaqannginnissaat qulakkeertussaavaat, annaasaqartarsimaneq oqaluttuarisaanermi ingerlatseqatigiiffinnik Namminersorlutik Oqartussanit pigineqartunut eqquisarsimasoq.

Naalakkersuisut sapinngisamik pitsaanerpaamik aalajangiinissaminnut tungavissaqartarnissaat isumannaarniarlugu siulersuisut siulersuisut pitsaassusiinik naliliineq suliarisarpaat, tassani siulersuisut ilaasortallu ataasiakkaat piginnaasaat

sulisinnaassuseqarnerallu nalilersorneqartarlutik. Siulersuisut pitsaassusiinik naliliisarnerit oqaatigineqareersutut siulersuisut katitigaaneranni piginnaasat ineriartortinneqassanersut aamma/imaluunniit iluarsisoqassanersoq ingerlaavarnissaq aammattaaq naliliinermut uuttuutigissallugu pingaarutilik pissusissaatut sianiginiarlugu naliliinermut atussallugit pitsaasuupput.

Siulersuisut pitsaassusiinik naliliinerit Ataatsimiititalianut ingerlaavartumik nassiunneqartalissappata Naalakkersuisut isumaat naapertorlugu tamatuma kingunerissavaa tunngaviumik arlalinnik ajornartorsiutitaqartoqalerneranik.

Siullermik siulersuisut pitsaassusiinik naliliinerit soorunalimi paasissutissanik inunntu tunngasunik isertuussasanillu imaqarput. Siulersuisut pitsaassusiinik naliliisarnerit atorluarsinnaasuujuaannassappata siulersuisut sulisinnaassuseqarnerannik piginnaasaannillu piviusumik allaatiginninnerusut, imarisaasa inunntu ikittuinnarnit suliarineqartarnissaat pingaaruteqarluinnarpoq. Siulersuini ilaasortat ilumoortumik isummaminnik tunuarsimaartitsinninnissaat aammalu imminnut illersornissaannut siulersuisut pitsaassusiinik naliliinernut aalajangiisuulluinnarpoq imminut tatigeqatigiinnerup qaffasissuunerata attatiinnarnissaa.

Inuiaqatigiit soqutigisarissavaat siulersuisut pitsaassusiinik naliliinerni siulersuisut sulisinnaassusiannik piginnaasaannillu piviusut allaaserineqartarnissaat, taakku sapinngisamik pitsaanerpaamik aalajangiinissamut tunngavissiusanngorlugit, Naalakkersuisut suliamut pikkorissunik siulersuisoqalernissaanut qulakkeerinnissinnaanngorlugit.

Siulersuisut pitsaassusiinik pitsaasumik naliliinerni siulersuisunut ilaasortat piginnaasaat assigiinngitsutigut nalilerneqartarput, erseqqissumillu takussutissaallutik siulersuisut unammilligassaannut pingaarutilinnut kiisalu unammilligassat naammassinissaannut kaammattuutitaqarlutik. Taamaammat paasissutissat inunntu tunngasuusarput, inummut nalilersorneqartumut nalilersuisumullu. Naalakkersuisut naliliipput imaalluarsinnaasoq siulersuisut pitsaassusiinik naliliinerit ileqqulersuutaannanngussasut piviusorsioortunik imaqanngitsut pisariaqartitsinerpaaginnarnit amerlanerusunut siammaanneqartalissagaluarunik.

Aappassaannik siulersuisunik ilaasortassanik toqqartuisarnejq tassaavoq Naalakkersuisut siulersuisut pitsaassusiinik naliliinerit atorlugit aammalu siulersuisunik ilaasortanik ingerlaavartumik attaveqartarnernik nalilersuisarnerat. Tamanna tunngavigalugu Naalakkersuisut nunami matumani suliassanik pingaarutilinnik ingerlatseqatigiiffiit suliassaannik pitsaanerpaamik naammassininnissaq qulakkeerniarlugu siulersuisuni ilaasortat katitertarpaat.

Siulersuisunik ilaasortassanik toqqartuisarnerup Naalakkersuisuniinnera aamma tassaavoq pissaanerit pingasunngorlugit avissimasut tunngaviinik atuutsitsineq, tamannalu Nunatsinni tamat oqartussaaqataanerannik aamma tunngaveqarpoq. Taamaasillutik Naalakkersuisut suliassaraat ingerlatseqatigiiffinni Namminersorlutik Oqartussanit pigineqartuni siulersuisunik ilaasortanik toqqartuisarnerup ingerlannissaa.

Sulinerup ammasuunissaa aammalu pissusissamisoortumik tamanit ataatsimiititalianiillu soqutiginninneq tunngavigalugu ”Ingerlatseqatigiiffinni tamakkiisumik ilaannakortumilluunniit Namminersorlutik Oqartussanit pigineqartuni piginnittuunermt taakkualu ineriartornerat pillugu Nalunaarusiaq”-mi pineqartoq pillugu unnersuussusiortoqarsimavoq. Toqqaannartumik tassani ingerlatseqatigiiffiit unnersuunneqarput siulersuisuni ilaasortat piginnaasaasa allattorsimaffiannik tamanut saqqummiussisaqqullugit. Naalakkersuisut siulersuisuni ilaasortat piginnaasaasa ammasumik pineqarnissaannik politikkeqarnerat tassaannaanngilaq Ataatsimiititalianik paasissutissiinissamik qulakkeeriniarneq, kisianni aamma tamanna tamanut ammasuunissamik tunngaveqarpoq.

Taakkua saniatigut ”Ingerlatseqatigiiffinni Namminersorlutik Oqartussanit pigineqartuni pitsaasumik aqutsinissamut malittarisassat” maanna ilusilersorlugit suliarineqarput. Tassunga atatillugu aalajangiiffigisassatut siunnersuutigineqartumi matumani eqqarsaatigineqartut ingerlatseqatigiiffinnit paasissutissiisarnerup pisariaqartumik itisilerneqarnerunissaanik eqqarsaatersornermt ilanngunneqassapput.

Ataatsimut isigalugu Naalakkersuisut isumaqarput siunnersuuteqartup siulersuisut pitsaassusiannik naliliinerit ingerlaavartumik nassiunneqartarnissaannik kissaatigisaata qularnanngitsumik kingunerissagaa Naalakkersuisut siulersuisut pisariaqartinneqartunik piginnaasaqarnerannik pitsaanerpaamillu ingerlanerannik naliliiuminaatsitsinerulernerannik. Ataatsimut isigalugu paasiniagassanik tunngaveqarani aalajangiinerit aalajangiinernut piviusorsiuunngitsunut tunngavigineqaratarsinnaasarpud.

Taamaammat tamanna tunuliaqutaralugu Naalakkersuisut isumaqarput siunnersuut isikkumisut isikkoqartillugu akuersaarneqassanngitsoq.